

BRINI SE TI O SEBI!

Neka je hvala Allahu, dž.š., Gospodaru svih svjetova. Neka su salavat i selam na Poslanika Muhammeda, s.a.v.s., njegovu časnu porodicu, ashabe i sve sljedbenike, koji se brinu o sebi.

Braćo moja u Dini Islamu! Danas je prvi dan mjeseca ša'bana, što znači da nam je do početka mjeseca ramazana ostalo još nekih mjesec dana. Tim povodom, a u sklopu naših priprema za doček najdražeg gosta, danas želim da razmislimo o jednoj kratkoj ali vrlo jakoj poruci, koja je istovremeno i naredba od strane našeg Gospodara, a koja se nalazi na početku 105. ajeta sure El-Maide. Ona glasi: **"O vjernici, brinite se o sebi!"** Ova poruka nije samo puki savjet da se brinemo o sebi, jer mi i sami znamo da se trebamo brinuti o sebi i da se ne trebamo zapuštati i drugima prepuštati, već ima jedno dublje značenje. Ako ovu poruku bukvalno prevedemo, onda ona glasi ovako: **"O vjernici, vaša je obaveza da se bavite sobom!"**

Na taj način preveden, ovaj ajet nam poručuje da istinski robovati Uzvišenom Allahu znači neprestano preispitivati i istražavati samoga sebe. To jest, da ne nađemo ni jednu deformaciju kod sebe a da je ne ispravimo, ni jedno loše djelo a da ga ne otklonimo, nijednu bolest i mahanu a da za njih lijek ne potražimo, te da u toj borbi sve do posljednjeg daha ustrajemo.

Braćo moja! Zadovoljstvo vlastitom dušom je dječija osobina, dok njeno zanemarivanje uz praćenje tuđih grješaka i mahana predstavlja put u propast. Zaista među nama ima ljudi, pa čak i grupa, koji neprestano brinu o tuđim grješkama i mahanama, dok svoje grješke i mahane uopće ne vide ili sami sebe smatraju haman nepogrješivim.

Ponositi se istinom je jedna stvar, a biti zadovoljan svojom dušom i vlastitim stanjem je sasvim druga stvar. Ponositi se istinom znači osjećati Allahovu dobrotu i veličinu Njegove upute koju je podario, te željeti da se istina proširi među ljudima. A biti zadovoljan samim sobom znači biti ohol i željeti poniziti one koji istinu još uvijek nisu spoznali, te zaboravljati na vlastite mahane i propuste.

Zabilježeno je da je jedan čovjek rekao svom ahbabu: "Volim te u ime Allaha!", pa mu je ahbab odgovorio: "Eh, da ti znaš o meni ono što ja znam o sebi, mrzio bi me u ime Allaha." Pa mu ovaj reče: "I kad bih znao o tebi ono što ti znaš o sebi, ja bih opet bio zauzet onim što znam o sebi."

Iskreni i pametni vjernik brigu brine o vlastitim a ne o tuđim grješkama i mahanama. On vapi za Allahovom milošću i oprostom i svjestan je da njegovo poznavanje istine, osim što mu donosi visoke deredže, vrlo lahko može da bude i dokaz protiv njega. Jer veće znanje znači i veću odgovornost pred Uzvišenim Gospodarom, odnosno veću kaznu ako se radi suprotno od znanja.

Prisjetimo se one predaje kada je neki čovjek rekao: "Allaha mi, tom i tom čovjeku Allah nikad neće oprostiti!" Pa je Allah objavio: "Ko je taj koji se zaklinje Mojim imenom da neću oprostiti tom i tom? Ja sam njemu oprostio, a tvoja dobra djela sam poništio."

S tim u vezi dr. Muhammed El-Gazali pripovijeda: "Sjećam se da me je jedan mladić sreo i ljutito mi rekao: 'Sjediš među obrijanim studentima i studenticama bez hidžaba, ljudi te vide kako si nasmijan a ne ljut, i ne čuju od tebe ni naredbe ni zabrane. Zar to tvoje stanje i ponašanje nije opravdanje onima koji te mrze i klevetaju?!'

Ja mu rekoh: 'Ne mislim da je srdžba jedan od zahtjeva da've i neodvojivo svojstvo daija. Ja prvo objašnjavam abecedu Islama u vjerovanju i moralu, i ako je sjeme pravo, plod će doći u svoje vrijeme. Onog dana kada ljudi budu spoznali svoga Gospodara i budu se prema Njemu odnosili po principu slušanja i pokornosti, tada će se ispuniti ono što tražiš, čak i više nego što očekuješ. A što se tiče klevetanja i napada na moju ličnost, ne znam šta da kažem, osim što zahvaljujem Allahu Koji je spustio zastor pa nemate pristupa meni.

Vi želite da ljudi budu otkriveni i osramoćeni da bi vaše duše bile zadovoljne, a ta želja je gora bolest od grijeha koje zamjerate ljudima. Sinko moj, bojim se da ste sa ovim mračnim namjerama i ciljevima vi gori od drugih. Grješnik slomljenog srca, kojeg boli njegov grijeh, časniji je od vaiza koji napada i vrijeđa ljude."

Braćo moja! Za ove ljude koje spominje El-Gazali u našem narodu postoji izreka: "**Prvo pometi ispred svojih vrata!**" Zato, pustimo druge na miru i pozabavimo se sobom! Mjesec ramazan se bliži, pa iskoristimo vrijeme da očistimo i uredimo svoje avlije!

Molim Dragog Allaha da nas uputi na Pravi put, put onih kojima je darovao Svoje blagodati, a ne na put onih na koje se naljutio, niti onih koji su zalutali. Amin.